

摘藻堂四庫全書薈要

集部

欽定四庫全書薈要

集部

漢魏六朝百三家集卷九十一



欽定四庫全書薈要卷一萬九千六百八十三集部

漢魏六朝百三家集卷九十一

明 張溥 輯

任昉集

賦

答陸倕知己賦

原知己之時義故相知之信然乃貪廉之異貫奈勇怯
之相懸貪在物而成累怯在我而可甄既自得於為御

復甘心於執鞭矧相知其如此獨攬涕而潺湲雖有望
於已知更非謂其知己信偉人之世篤本侯服於陸鄉
緬風流於道素襲衣與繡裳逮伊人而世載並三駿
而龍光過龍津而一息望鳳條而載翔彼白玉之雖潔
此幽蘭之信芳思在物之取譬非升斛而能量匹聳峙
於東嶽比凝厲於秋霜不一飯以忘過每三錢以投渭
匪蒙袂之敢嗟豈溝壑之能衣既蘊藉其有餘又澹然
而無味得意同乎卷懷違方似乎仗氣類平叔而靡雕

似子臺而不朴冠衆善而貽操綜群言而名學折高戴
於后臺異鄒顏乎董幄探三詩於河間訪九師於淮曲
術兼口傳之書藝廣鏗鏘之樂時坐睡而懸梁裁據梧
而錐幄既文過而意深又理勝而辭縟咨余生之荏苒
追歲暮而傷情測徂陰於堂下聽鳴鐘於洛城惟忘年
之陸子定一遇於班荆余獲田蘇之價爾得海上之名
信落魄而無產終長勤於短生饑虛表於徐步逃責顯
於疾行子比我於叔則又方余於耀卿心照情交流言

靡惑萬類闇求千里懸渴言象可廢筌蹄自默居非連
棟行則同車冬夜不長夏日靡餘肴核非餌絲竹豈娛
我未捨駕子已迴輿中飲相顧悵然動色邦壤雖殊離
會難測存異山陽之居沒非要離之側以膠投漆中離
婁豈能識

靜思堂秋竹賦

靜思堂連洞房臨曲沼夾修篁竹宮豐麗于甘泉之右
竹殿弘敞于神嘉之傍綠條發丹檻翠葉映雕梁入房

掃文石傍簷拂象牀常生偶蘭桂結實值鴛凰逢性與
之至道偶斯文之在茲歡栢梁之有賦恨相如之異時

賦體

倣征侶兮艤行舟奉君命兮不俟駕屬軒軌之易循值
堯民之可化慙孺雉之聲朝惡細魚之在夜奉玉檢之
陸離侍金罍之云舍

詔

為武帝初封功臣詔

草昧權輿事深締構康俗成務義在庇民自非羣才並軌文武宣翼將何以啓茲景祚弘此帝圖或運籌帷帳經啓王業或攻城略楚殉義忘生或腹心爪牙折衝御侮忠勤茂德夷險一致並宜建國開宇蕃屏王室山河之誓永永無窮

求薦士詔

夫進賢茂賞蔽善明罰前王盛則咸必由之朕纂統鴻業寅畏大寶思求俊異協贊雍熙歷聽九功物色輿皂

而白駒盈谷萑楚未刈是以臨朝永歎日昃伊佇便可
博詢卿士各舉所知將量才授能擢以不次庶同則哲
之明稱朕急賢之旨

為武帝追封丞相長沙王詔

夫褒崇名器率由舊章光昭德祀永世作則亡兄道被
如仁功深微管懸諸日月久而彌新故能拯龜玉於尸
毀導涸源於將塞今理運維新賢戚並建感惟永遠觸
目崩心可追封長沙郡王

為武帝追封永陽王詔

亡兄德履冲粹識業深通微聲善譽風流籍甚道長世
短清塵緬邈感惟既往永慕慟心可追封永陽郡王

追封汝陽王桂陽王詔

亡弟暢風標秀物器體淹弘朱方之役盡勤王事策出
無方物惟不賞亡弟融業行清簡風度閒綽蚤優名輩
夙廣令聞朕應天紹命君臨萬寓祚啓郇滕感興魯衛
事往運來永懷傷切暢可追封衡陽郡王融可桂陽郡

王

封臨川安興建安三王詔

神州帝城冠冕列岳渚宮樊鄧形勝是歸居中作衛翼
宣戎重隆茲寵號寔允舊章並非親勿居惟賢斯授宏
朕之介弟早富德譽董一蕃政緝是嘉庸國禮家情瞻
寄隆重季風穎雋邁誠業標簡任居蕃翰政以化成儻
體韻淹穆神寓凝正經綸夷險參贊王業

為齊帝禪位梁王詔

夫五德更始三正迭興馭物資賢登庸啓聖故帝跡所以代昌王度所以改耀草晦以明由來尚矣齊德淪微危亡荐襲隆昌凶虐寔違天地永元昏暴取紊人神三光再沈七廟如綴鼎業幾移含識知泯我高明之祚眇焉將墜永惟屯難永谷載懷相國梁王天誕睿哲神縱靈武德格玄祗功均造物止宗社之橫流反生民之塗炭扶傾頽構之下拯溺逝川之中九區重緝四維更紐絕禮還紀崩樂復張文館盈紳戎亭息警浹海寓以馳

風罄輪裳而稟朔八表呈祥五靈效祉豈止鱗羽禎奇
雲星瑞色而已哉勲茂於百王道昭乎萬代固以明配
上天光華日月者也河嶽表革命之符圖讖紀代終之
運樂推之心幽顯共積謳頌之誠華裔同著昔水政既
微木德升緒天之歷數實有所歸握鏡璇樞允集明哲
朕雖庸蔽闇於大道永鑒崇替為日已久敢忘列代之
高義人祗之至願乎今便敬禪于梁即安姑孰依唐虞
晉宋故事

璽書

禪梁璽書

夫生者天地之大德人者含生之通稱並首同本未知所以異也而稟靈造化賢愚之情不一託性五常強柔之分或舛群后靡一爭犯交輿是故建君立長用相司牧非謂尊驕在工以天下為私者也兼以三正迭改五運相遷緣文赤字徵河表洛在昔勛華深達茲義眷求明哲授以蒸人遷虞事夏本因心於百姓殷化為周實

受命於蒼昊爰自漢魏罔不率由降及晉宋亦遵斯典
我高皇所以格文祖而撫歸運畏上天而恭寶歷者也
至於李世禍亂荐臻王度紛糾姦回熾積億兆夷人刀
俎為命已然之逼若綫之危跼天躋地逃形無所羣凶
扶煽志逞殘戮將欲先殄衣冠次移龜鼎衡保周召並
列宵人巢幕累卵方此非切自非英聖遠圖仁為己任
則鵠臬厲吻翦焉已及惟王崇高則天博厚儀地鎔鑄
六合陶甄萬有鋒驛交馳振靈武以遐略雲雷方扇鞠

義旅以勤王揚旂旆於遠路戮姦宄於魏闕德冠往初
功無與二弘濟艱難緝熙王道懷柔萬姓經營四方舉
直錯枉較如畫一待旦同乎殷后日昃過於周文風化
肅穆禮樂交暢加以赦過宥罪神武不殺盛德昭於景
緯至義感於鬼神若夫納彼大麓膺此歸運烈風不迷
樂推攸在治五建於已亂重九鼎於既輕自聲教所及
車書所至草面回首謳吟德澤九山滅祲四瀆安流祥
風扇起淫雨靜息元甲遊於芳莖素文馴於郊苑躍九

川於清漢鳴六象於高崗靈瑞雜沓玄符昭著至於星
孛紫宮水効孟月飛鴻滿堦長彗橫天取新之應既昭
草故之徵必顯加以天表秀特軒狀堯姿君臨之符諒
非一揆書云天監厥德用集大命詩云文王在上於昭
于天所以二儀乃眷幽明允叶豈惟宅是萬邦緝茲謳
訟而已哉朕是用擁璇沈首屬懷聖哲昔水行告厭我
太祖既受命代終在日天祿云謝亦以木德而傳於梁
遠尋前典降惟近代百辟遐邇莫違朕心今遣使持節

兼太保侍中中書監兼尚書令汝南縣開國侯亮兼太尉散騎常侍中書令新吳縣開國侯志奉皇帝璽綬受終之禮一依唐虞故事王其陟茲元后君臨萬方式傳弘烈以答上天之休命

冊

禪梁冊

咨爾梁王惟昔邃古之載肇有生人皇雄大庭之辟赫胥尊盧之后斯並龍圖鳥跡以前恍惚杳冥之世固無

得而詳焉洎乎農軒炎皞之代放勳重華之主莫不以
大道君萬姓公器御八紘居之如執朽索去之若捐重
負一駕汾陽便有宵然之志暫適箕嶺即動讓王之心
故知戴黃屋服玉璽非所以示貴稱尊乘大輅建旆旌
蓋欲令歸趣有地是故忘已而字兆人殉物而君四海
及於精華內竭畚櫓外勞則撫茲歸運惟能是與况兼
乎笙管草文威圖啓瑞攝提夜朗榮光晝發者哉四百
告終有漢所以高揖黃德既謝魏氏所以樂推爰及晉

宋亦弘斯典我太祖握河受歷應符起運二葉重光三
聖係軌嗣君喪德昏棄紀度毀紊天綱凋絕地紐茫茫
九域翦為仇讐溥天相顧命懸晷刻斷涉剋孕於事已
輕求難徵杖曾何足譬是以谷滿川枯山飛鬼哭七廟
已危人神無主惟王體茲上哲明聖在躬稟靈五緯明
並日月彞倫攸叙則端冕而協邕熙時難孔棘則推鋒
而拯塗炭功踰造物德濟蒼生澤無不漸仁無不被上
達蒼昊下及川泉文教與鵬翼齊舉武功與日車並運

固以幽顯宅心謳訟斯屬豈徒桴鼓播地卿雲叢天而
已哉至如晝覩爭明夜飛枉矢土淪彗刺日既星亡除
舊之徵必顯更姓之符允集是以義師初踐芳露凝甘
仁風既被素文自擾北闕藁街之使風車大徼之民膜
拜稽首願為臣妾鍾石畢變事表於遷虞蛟魚並出義
彰於事夏若夫長人御衆為之司牧本同已於萬物乃
因心於百姓寶命無常主帝王非一族今仰祗乾象俯
藉人願敬禪神器授帝位於爾躬大祚告窮天祿永終

於戲王允執其中式遵前典以副昊天之王望禋上帝而
臨億兆格文祖而膺大業以傳無疆之祚豈不盛歟

令

為齊宣德皇后答梁王令

承固茲謙揖未膺大典敬復雅旨良有憮然夫至寂難
原言象所絕教思有律感通斯在所以異人者神明同
人者用舍王誕茲上睿對越天行德冠二儀化周羣動
生民以來一人而已但達節弘道每濡跡於中庸神照

惟幾不抑心於鑽仰范宣既讓其下取則況聖圖睿範
歌思是歸廉約雖弘慶賞遂替誠賢者悅義長難進之
風不肖者矜功阻竭力之效勸阻之間所差已遠王何
得不暫紆雅尚允答天人使朕夜艾以安早朝有豫今
遣率茲百辟申薦誠款萬致一塗煩言可略

宣德太后再敦勸梁王令

宣德皇后敬問具位夫功在不賞故庸勲之典蓋闕施
侔造物則謝德之途已寡要不得不強為之名使荃宰

有寄公實天生德齊聖廣淵不改參辰而九星仰止不
易日月而二儀貞觀在昔晦明隱鱗戢翼博通羣籍而
讓齒乎一卷之師劒氣凌雲而屈跡於萬夫之下辯折
天口而似不能言文擅雕龍而成輒削豪爰在弱冠首
應弓旌客游梁朝則聲華籍甚薦名宰府則延譽自高
隆昌季年勤王始著建武維新締構斯在功隆賞薄嘉
庸莫疇一馬之田介山之志愈厲六百之秩大樹之號
斯存及擁旄司部代馬不敢南牧推轂樊鄧胡塵罕嘗

夕起惟彼狡童窮凶極虐衣冠泯絕禮樂崩喪既而鞠
旅誓衆言謀王室白羽一麾黃鳥底定甲既鱗下車亦
尾裂致天之屈拱揖羣后豐功厚利無得而稱是以祥
光總至休氣四塞五老游河飛星入昴元功茂勲若斯
之盛而地狹乎四履勢卑乎九伯帝有憑焉輶軒萃止
今遣某位某甲等率茲百辟人致其誠庶匪席之旨不
遠而復

為宣德太后重敦勸梁王令

朕聞匹夫好仁義在磨踵君子行道達斯兼濟未有盡
器窮神蘊微章乎天植高奠中樽覩傾壘而弗拯惟王
德冠往初功無與二四時等契兩曜齊明擬度天行取
則乾健而運距艱季道極百王援義而起一戎大定羅
山草草罔不率從用使商庭產蕙周闕樹梓傾宮既散
鹿臺靡蓄盛德大業巍巍若此日者事岐之號爰發帝
言殊物備禮率由寡昧雖復雲罕載路清蹕啓行昭德
報功未臻其極而高揖天休遠存克讓俾予未忘興慙

日昃今遣率茲百辟人致誠情庶有感睿心霈然降志
教

為齊竟陵王世子臨會稽郡教

富人兼并前史共蠹大姓侵威往哲攸嫉而權豪之族
擅割林池勢富之家專利山海至乃水稱峻巖嚴我君
后崇墉增似內通神明出符大順火炎崑崙神嶽崩潰
蘭艾同燼玉石俱碎哲人遭命哀有餘慨

表

為齊明帝讓宣城郡公表

明帝作相令昉草讓封表沿故事也
昉濡瀉懇迫情事太露故帝愠之

臣鸞言被臺召以臣為侍中中書監驃騎大將軍開府儀同三司揚州長史錄尚書事封宣城郡開國公食邑三千戶加兵五千人臣本庸才智力淺短太祖高皇帝篤猶子之愛降家人之慈世祖武皇帝情等布衣寄深同氣武皇大漸實奉話言雖自見之明庸近所蔽愚夫一至偶識量已實不忍自固於綴衣之辰拒違於玉几

之側遂荷顧託導揚末命雖嗣君棄常獲罪宣德王室
不造職臣之由何者親則東牟任惟博陸徒懷子孟社
稷之對何救昌邑爭臣之譏四海之議於何逃責陵土
未乾訓誓在耳家國之事一至於斯非臣之尤誰任其
咎將何以肅拜高寢虔奉武園悼心失圖泣血待旦寧
容復徼榮於家耻宴安於國危驟騎上將之元勲神州
儀刑之列岳尚書古稱司會中書實管王言且虛飾寵
章委成禦侮臣知不愜物誰謂宜但命輕鴻毛責重山

獄存沒同歸毀譽一貫辭一官不減身累增一職已黷
朝經便當自同體國不為飾讓至於功均一匡賞同千
室光宅近甸奄有全邦殞越為期不故聞命亦願曲留
降鑒即垂聽許鉅平之懇誠必固永昌之丹慊獲申乃
知君臣之道綽有餘裕苟曰易昭敢守難奪故可庶心
弘議酌已親物者矣不勝荷懼屏營之誠謹附某官某
甲奉表以聞

為范尚書讓吏部封侯表

臣雲言被尚書召以臣為散騎常侍吏部尚書封霄城
縣開國侯食邑千戶奉命震驚心顏無措臣雲頓首頓
首死罪死罪臣素門凡流輪翮無取進謝中庸退慚狂
狷固嘗鑽厲求學而一經不治篆刻為文而三冬靡就
負書燕魏空殫菽粟躡屣齊楚徒知貧賤既而分虎出
守以囊被見嗤持斧作牧以薏苡興謗赭衣為虜見獄
吏之尊除名為民知井臼之逸百年上壽既曰徒然如
其誠說亦以過半亂離斯瘼欲以安歸閉門荒郊再離

寒暑兼以東臯數畝控帶潮汐關外一區悵望鍾臯雖
室無趙女而門多好事祿微賜金而歡同娛老折芟燔
枯此焉自足陛下應期萬世接統千祀三千景附八百
不謀臣鬻等離心功慚同德泥首在顏輿棺未毀締構
草昧敢叨天功獄訟謳歌示同民志而隆器大名一朝
總集顧已反躬何以臻此政當以接開白水列宅舊豐
忘捨講之尤存諸公之費俯拾青紫豈待明經臣雲頓
首頓首死罪死臯夫銓衡之重關隆替遠惟則哲在

帝猶難漢魏以降達識繼軌雅俗所歸惟稱許郭拔十
得五尚曰比肩其餘得失未聞偶察童幼天機暫發顧
無足算在魏則毛玠公方居晉則山濤識量以臣況之
一何遼落齊季陵遲官方淆亂鴻都不綱西園成市金
章有盈筭之談華貂深不足之嘆草創惟始義存改作
恭已南面責成斯在豈宜妄加寵私以乏王事附蟬之
飾空成寵章求之公私授受交失近世侯者功緒參差
或足食關中或成軍河內或制勝帷幄或門人加親或

與時抑揚或隱若敵國或策定禁中或功成埜戰或盛
德如卓茂或師道如桓榮或四姓侍祀已無足紀五侯
外戚且非舊章而臣之所附惟在恩澤既義異疇庸實
榮垂儒者雖小人貪幸豈獨無心臣本自諸生家承素
業門無富貴易農而仕乃祖玄平道風秀世爰在中興
儀刑多士位裁元凱任止牧伯高祖少連夙秉高尚所
富者義所乏者時薄宦東朝謝病下邑先志不忘愚臣
是庶且去歲冬初國學之老博士耳今茲首夏將亞冢

司雖千秋之一月九遷荀爽之十旬速至方之微臣未
為速達臣雖無識惟利是視至於虧名損實為國為身
知其不可不敢妄冒陛下不棄管蒯愛同絲麻儻平生
之言猶在聽覽宿心素志無復貳辭矜臣所乞特迴寵
命則彛章載穆微物知免臣今在假不容請省不任荷
懼之至謹奉表以聞

為褚諮議綦讓代兄襲封表一

一昨被司徒符印稱詔旨許臣兄賁所請以臣紹封南

康郡公臣世屬啓聖運偶時來尚德疇庸先錫土宇臣
賁載世承家兄居長德而量已夙退內事園蔬以臣行
達幽明早酷荼苦賁天倫冥至友愛淳深非直引瘠推
溫故能逃跡讓位鞠育提養以及人次事死讓生尚均
脫屣取信十室本若錙銖乃遠謬推恩近需庸薄能以
國讓弘義有歸匹夫難奪守以弗二昔武始迫家臣之
策陵陽感鮑子之言張以誠請丁為理屈且太宗絕緒
命臣出繼傍統稟承在昔理絕終天永懷情事觸感崩

裂伏惟陛下俯權孤門哀榮之重爰奪臣賁一至之輕
察其丹款特賜停絕至公允穆微臣充幸

為諸諮議蔡讓代兄襲封表二

近冒披款庶蒙哀亮奉被還詔朱垂矜允伏讀周遑罔
寘心誠臣本凡劣身名不限標一善不足以驗風流存
小讓不足以弘進止若乃富埒千駟貴有邦家二者之
來不期而止中人猶其趨趨凡近固宜勉勗直以門緒
有歸長德無二若使賁高延陵之風臣忘子臧之節是

廢德舉豈曰能賢陛下留心孤門特深追遠故臣窮必
呼天憑威咫尺貢嬰疾沉固公私廢禮逢不世之恩遂
良已之志確然難奪有理存焉臣既承先旨出繼傍統
受命有資反身何奉敎心感悼義迫窮誠貢息霽年將
志學禮及趨拜且私門世適二三攸序若天眷無已必
降殊私乞臣霽奉膺珪社伏願陛下聖慈曲垂矜慎如
蒙哀允施重含育

為諸諮議秦讓代兄襲封表

臣綦言昨被司徒符仰稱詔旨許臣兄賁所請以臣襲封南康郡公臣門籍勲蔭光錫土宇臣賁世載承家允膺長德而深鑒止足脫屣千乘遂乃遠謬推恩近萃庸薄能以國讓弘義有歸匹夫難奪守以勿貳昔武始迫家臣之策陵陽感鮑生之言張以誠請丁為理屈且先臣以大宗絕緒命臣出纂傍統稟承在昔理絕終天永惟情事觸目崩隕若使賁高延陵之風臣忘子臧之節是廢德舉豈曰能賢陛下察其丹款特賜停絕不然投

身草澤苟遂愚誠耳不任丹慊之至謹詣闕拜表以聞

臣誠惶誠恐

此篇出文選與藝文所載二表中有異同恐是後人裒合為一今並載之

為王思遠讓侍中表

行則六尺之內陪接天光語則親璽申命誠信區宇獻
可替否出納惟幾敷奏於聲華之上進讓於玉堂之下
金遷七貴之茂玉粲二公之孫雖復仲尉孤緒元卿末
裔未有不階民譽安承典私者也

為皇太子求一日一入朝表

臣聞內豎告安姬昌怡色鳴雞戒旦周發冠履或以涼
燠之候晨昏異宜膳羞之和鼎飪殊節一辰三朝稱情
猶簡終日承顏在理斯愜且長壽之對撫循無已馳道
未窮顧懷不輟豈直下動天性固亦上結慈衷自頃半
旬乃朝遂為通制事諭信次義乖晨省一日萬機不敢
三塵御省每旦改宿特乞一至寢門

請祀郊廟備六代樂表

據魏王肅議周禮賓客皆作備樂況天地宗廟事之大

者周官以下六律六呂五聲八音六舞大合樂致鬼神
以和邦國請依王肅祀祭郊廟備六代樂

為范始興求為太宰立碑表

臣雲言原夫存樹風猷沒著徽烈既絕故老之口必資
不刊之書而藏諸名山則陵谷遷貿府之延閣則青編
落簡然則配天之迹存乎泗水之上素王之道紀於沂
川之側由是崇師之義擬迹於西河尊主之情致之於
堯禹故精廬妥啟必窮鐫勒之盛君長一城亦盡刊刻

之美況乎甄陶周召孕育伊顏故太宰竟陵文宣王臣
某與存與亡則義形社稷嚴天配帝則周公其人體國
端朝出藩入守進思必告之道退無苟利之專五教以
倫百揆時序若夫一言一行盛德之風琴書藝業述作
之茂道非兼濟事止樂善亦無得而稱焉人之云亡忽
移歲序鴟鴞東徙松楸成行六府臣僚三藩士女人蒿
油素家懷鉛筆瞻彼景山徒然望慕昔晉氏初禁立碑
魏舒之亡亦從班列而阮略既泯故首冒嚴科為之者

竟免刑戮置之者反蒙嘉歎至於道被如仁功參微管
本宜在常均之外故太宰淵丞相疑親賢並軌即為成
規乞依二公前例賜許刊立寧容使長想九原樵蘇罔
識其禁駐蹕長陵輜軒不知所適臣里閭孤賤才無可
甄值齊網之弘弛賓客之禁策名委質忽焉二紀慮先
犬馬厚恩不答而弊帷毀蓋未戢螻蟻珠襦玉匣遽飾
幽泉陛下弘獎名教不隔微物使臣得駿奔南浦長號
北陵既曲逢前施實仰覲後澤儻驗杜預山頂之言庶

存馬駿必拜之感臨表悲愍言不自宣

為梁公請刊改律令表

臣聞淳源既遠天討是因畫衣象服以致刑厝草纓艾
鞮民不能犯及淳德下哀運距澆季湯刑禹政不足禁
姦九法三章無以息訟所以赭衣塞路圜犴成市凝脂
已疎秋荼未苦姦吏為市生殺並用可為慟哭豈徒一
緒夫肖貌天地稟靈川岳受體愛敬髮膚為重流矢影
風顧有憂色而當妄加剗斮金衣為伍且夫刻木不對

畫地不入畏避若是而動貽非命王道為虧良在於此
法開二門為政之蠹生殺多緒誰其適從

為蕭揚州作薦士表

臣王言臣聞求賢暫勞垂拱永逸方之疏壤取類導川
伏惟陛下道隱旒纁信克符璽六飛同塵五讓高世白
駒空谷振鷺在庭猶思隱鱗卜祝藏器屠保物色關下
委裘河上非取製於一狐諒求味於乘采而五聲倦響
九工是詢寢議廟堂借聽輿皂臣位任隆重義兼家邦

實欲使名實不違徼倖路絕勢門上品猶當格以清譚
英俊下僚不可限以位貌竊見秘書丞琅琊王暕年二
十一字思晦七葉重光海內冠冕神清氣茂允迪中和
叔寶理遣之譚彥輔名教之樂故以暉映先達領袖後
進居無塵雜家有賜書辭賦清新屬言玄遠室邇人曠
物疎道親養素丘園台階虛位庠序公朝萬夫傾望豈
徒荀令可想李公不亡而已哉前晉安郡侯官令東海
王僧孺年三十五理尚棲約思致恬敏既筆耕為養亦

傭書成學至乃集螢映雪編蒲緝柳先言往行人物雅
俗甘泉遺儀南宮故事畫地成圖抵掌可述豈直鼯鼠
有必對之辯竹書無落簡之謬矚坐鎮雅俗弘益已多
僧孺訪對不休質疑斯在並東序之秘寶瑚璉之茂器
誠言以人廢而才實世資臨表悚戰猶思未允不任下
情

為蕭侍中拜襲封表

詔書拜臣襲封竟陵郡王臣以凡庸素乏才植皇朝尚

德詔爵惟賢遂復出修職貢入頒卿士但有道之守海
外重局藩籬近甸無勞擊柝仰閱舊章俯增私感報國
承家豈云萬一

為吏部謝表

郎官之重千金非譬爰在前世實光選造清通為首終
遂弗居深識為度累薦無獲承乏攝官顧知其望方今
皇明御宇昇長咸亨涇渭縉紳無謬衡石抑揚庶品亦
候能官顧已循涯孰用祇荷惟知死所未識所報

彈文

奏彈曹景宗

御史中丞臣任昉稽首言臣聞將軍死綏咫尺步無却顧
望避敵逗撓有刑至乃趙母深識乞不為坐魏主著令
抵罪已輕是知敗軍之將身死家戮爰自古昔明罰在
斯臣昉頓首頓首死罪死罪竊尋獠獫侵軼暫擾疆陲
王師薄伐所向風靡是以淮徐獻捷河兗凱歸東關無
一戰之勞塗中罕千金之費而司部懸隔斜臨寇境故

使狡虜憑陵淹移歲月故司州刺史蔡道恭率勵義勇
奮不顧命全城守死自冬徂秋猶轉戰無窮亟摧醜虜
方之居延則陵降而恭守比之疎勒則耿存而蔡亡若
使郢部救兵微接聲援則單于之首久懸北關豈直受
降可築涉安啟土而已哉實由郢州刺史臣景宗受命
致討不時言邁故使蝟結蟻聚水草有依方復按甲盤
桓緩救資敵遂令孤城獨守力屈凶威雖然猶應固守
三關更謀進取而退師延頸自貽虧衄疆場侵駭職是

之由不有嚴刑誅賞安寘景宗即主臣謹案使持節都督郢司二州諸軍事左將軍郢州刺史湘西縣開國侯臣景宗擢自行間邁茲多幸指縱非擬獲獸何勤賞茂通侯榮高列將負擔裁弛鐘鼎遽列和戎莫效二八已陳自頂至踵功歸造化潤草塗源豈獲自己且道恭云逝城守累旬景宗之存一朝棄甲生曹死蔡優劣若是惟此人斯有覩面目昔漢光命將坐知千里魏武置法案以從事故能出必以律鎔銖無爽伏惟聖武英挺略

不世出料敵制變萬里無差奉而行之實弘廟算惟此
庸固理絕言提自逆胡縱逸久患諸夏聖朝乃顧將一
車書愍彼司氓致辱非所早朝永歎載懷矜惻致茲虧
喪何所逃罪宜正刑書肅明典憲臣謹以効請以見事
免景宗所居官下太常削爵土收付廷尉法獄治罪其
軍佐職僚偏裨將帥絰諸應及咎者別攝治書侍御史
隨違續奏臣謹奉白簡以聞臣昉誠惶誠恐頓首頓首
死罪死罪臣昉稽首以聞

奏彈劉整

御史中丞臣任昉稽首言臣聞馬援奉嫂不冠不入汜
毓字孤家無常子義士節夫聞之有立千載美談斯為
稱首臣昉頓首頓首死罪死罪謹案齊故西陽內史劉
寅妻范詣臺訴列稱出適劉氏二十許年劉氏喪亡撫
義孤弱叔郎整恒欲傷害侵奪分前奴教子當百並已
入衆又以錢婢姊妹溫仍留奴自使又奪寅息遂婢
綠草私貨得錢並不分遂寅第二庶息師利去歲十月

往整田上經十二日整便責范米六斗哺食米未展送
忽至戶前隔箔攘拳大罵突進房中屏風上取車帷准
米去二月九日夜婢采音偷車欄夾杖龍牽范問失物
之意整便打息遂整及母并奴婢等六人來共至范屋
中高聲大罵婢采音舉手查范臂求攝檢如訴狀輒攝
整父舊使奴海蛤到臺辯問列稱整亡父興道先為零
陵郡得奴婢四人分財以奴教子乞大息寅寅亡後弟
二弟整仍奪教子云應入衆整便留自使婢姊及弟各

整錢五千文不分遂其奴當百先是衆奴整兄弟未分財之前整兄寅以當百貼錢七千共衆作田寅罷西陽郡還雖未別大食寅以私錢七千贖當百仍使上廣州去後寅喪亡整兄弟後分奴婢惟餘婢綠草入衆整復云寅未分財贖當百又應屬衆整意貪得當百推綠草與遂整規當百行還擬欲自取當百遂經七年不返整擬已死亡不迴更奪取婢綠草貨得錢七千整兄弟及姊共分此錢又不分遂寅妻范云當百是亡夫私贖應

屬息遂當百天監二年六月從廣州還至整復奪取云
應克衆准雇借上廣州四年夫直今在整處使進責整
婢采音劉整兄寅第二息師利去年十月十二日忽往
整墅停住十二日整就兄妻范求米六斗哺食范未得
還整怒仍自進范所住屏風上取車帷為質范送米六
斗整則納受范今年二月九日夜云失車欄子夾杖龍
牽等范及息遂道是采音所偷整聞聲仍打遂范喚問
何意打我兒整母子爾時便同出中庭隔箔與范相罵

婢采音及奴教子楚玉法忠等四人於時在整子母左

右整語采音其道汝偷車校具汝何不進裏罵之既進

爭口舉手誤查范臂車欄夾杖龍牽實非采音所偷進

責寅妻范奴苟奴列稱娘去二月九日夜失車欄夾杖

龍牽疑是整婢采音所偷苟奴與郎遂往津陽門糴米

遇見采音在津陽門賣車欄龍牽苟奴登欲捉取遂語

苟奴已爾不須復取苟奴隱避少時伺視人買龍牽售

五千錢苟奴仍隨遂歸宅不見度錢並如采音苟奴等

列狀粗與范訴相應重覈當百教子列稱被奪今在整

處使悉與海蛤列不異以事訴法令史潘僧尚議整若

輒略兄子遂分前婢貨賣及奴教子等私使若無官令

輒收付近獄測治諸所連逮繼應洗之原委之獄官悉

以法制從事如法所稱整即主臣謹案新除中軍參軍

臣劉整問閭闔葺名教所絕直以前代外戚仕因紈袴

惡積釁稔親舊側目理絕通問而妄肆醜辭終夕不寐

而謬加大杖薛包分財取其老弱高鳳自穢爭訟寡嫂

未見孟嘗之深心唯倣文通之偽迹昔人睦親衣無常
主整之撫姪食有故人何其不能折契鍾庾而襜帷交
質人之無情一何至此實教義所不容紳冕所共棄臣
等參議請以見事免整新除官輒勒外付廷尉法獄治
罪諸所連逮應洗之源委之獄官悉以法制從事婢采
音不款偷車欄龍牽請付獄測實宗長及地界職司初
無糾舉及諸連逮請不足申盡臣昉誠惶誠恐頓首頓
首死罪死罪稽首以聞

奏彈范縝

臣聞息夫歷詆漢有正刑白襃一奏晉以明罰况乎附
下訕上毀譽自口者哉風聞尚書左丞臣范縝自晉安
還語人云我不詣餘人惟詣王亮不餉餘人惟餉王亮
輒收縝白從左右萬休到臺辯問與風聞符同又今月
十日御餞梁州刺史臣珍國宴私既洽羣臣並已謁退
時詔留侍中臣昂等十人訪以政道縝不答所問而橫
議沸騰遂貶裁司徒臣肱褒舉庶人王亮臣于時預奉

恩留肩隨並立耳目所接差非風聞竊尋王有遊豫親御軒陛義深推轂情均湛露酒闌宴罷當宸正立記事在前記言在後軫早朝之念深求瘼之情而縝言不遜妄陳褒貶傷濟濟之風缺側席之望不有嚴裁憲准將縝縝即主臣謹案尚書左丞臣范縝衣冠緒餘言行舛駁誇諧里落喧詬周行曲學諛聞未知去代弄口鳴舌祇足飾非乃者義師近次縝丁罹艱棘曾不呼門墨讓景附縝同先覺實奉龍顏而今黨協釁餘翻為矛盾人

而無恒成茲姦諛日者飲至策勲功微賞厚出守名邦
入司管轄苞蘊罔遺而假稱折轅衣裙所弊讒激失所
許與疵廢廷辱民宗自居樞憲糾奏寂寞顧望縱容無
至公之議惡直醜正有私許之談宜寘之微繆肅正國
典臣等參議請以見事免績所居官輒勒外收付廷尉
法獄治臯應諸連逮委之獄官以法制從事績位應黃
紙臣輒奉白簡以聞

奏彈蕭穎達

臣聞貧觀所取窮視不為在於布衣窮居介然之行尚
可以激貪厲俗淳此薄夫況乎伐木之家爭雞豚之利
衣繡之士受賈人之服風聞征虜將軍臣蕭穎達啓乞
魚軍稅輒攝穎達宅督彭難當到臺辯問列稱尋生魚
典稅先本是鄧僧琰啓乞限訖今年五月十四日主人
穎達於時謂非新立仍啓乞接代僧琰即蒙降許登稅
與史法論一年收直五十萬知其列狀則與風聞符同
穎達即主臣謹按征虜將軍太子左衛率作唐縣開國

侯臣穎達備位大臣預聞執憲私謁亟陳至公寂寞屠
中之志異乎鮑肆之求魚餐之資不俟潛有之數遂復
申茲文二追彼十一風體若茲準繩斯在陛下弘惜勲
良每為曲法臣當官執憲敢不直繩臣等參議請以見
事免穎達所居官以侯還第

啓

上蕭太傅固辭奪禮啓

昉啓近啓歸訴庶諒窮款奉被還旨未垂哀察悼心失

圖泣血待旦昉於品庶示均鎔造干祿祈榮更為自拔
虧教廢禮豈關視聽所不忍言具陳茲啓往來末宦祿
不代耕饑寒無甘旨之資限役廢晨昏之半膝下之歡
已同過隙几筵之慕幾何可憑且奠酌不親如在安寄
晨暮寂寥閒若無主所守既無別禮窮咽豈及多喻明
公功格區宇感通有塗若霈然降臨賜寢嚴命是知孝
治所被爰至無心錫類所及匪徒教義不任崩迫之情
謹以啓事陳聞謹啓

求為劉瓛立館啓

昔在魏中爰及晉始書貴虛玄人悅陶縱瑚璉廢泗上
之容樽俎恣林下之適春千秋羽委曠而弗陳西序東
膠寂寥而誰仰所以金雞忘曉玉羊失馭神器毀於獯
戎寶歷遷於于越豈不悲歟劉瓛澡身浴德修行明經
賤珪璧於光陰意松筠於歲晚貧不隕穫其心窮不二
三其操而困無居止浮寓親游垣棟傾替室衢墊側有
朋自遠無用栖憑皆負笈擔簦櫛風沐露瓛之器學無

謝前修輒欲與之周旋開館招屈臣第西偏官有閒地
北拒晉山南望通邑雖曰人境實少浮喧廣輪裁盈數
畝布以施立黌塾薄藝桑麻粗創茨宇

奉勅示七夕詩啓

臣昉啓奉勅并賜示七夕五韻竊惟帝迹多緒俯同不
一託情風什希世罕工雖漢在四世魏稱三祖寧足以
繼想南風克諧調露性與天道事絕稱言豈其多幸親
逢旦暮臣早奉龍潛與賈馬而入室晚屬天飛比嚴徐

而待詔惟君知臣見於訥言之旨取求不疵表於辯才
之戲謹輒牽率庸陋式訓天獎拙速雖效蚩鄙已彰臨
啓慚慙固識所寔謹啓

為王金紫謝齊武帝示太子律序啓

臣聞化澄上業草纓垂典教清中世艾服懲刑自禮失
宗周俗反炎漢張馮導其迹賈杜浚其流仲舒之得情
孔子之博約故以義該往哲盡美前王而年世浸遠篇
牘訛誤朽編落簡見誣前叔侮文擅議取弊後昆立不

倚衡遂均鴻毛之殞傷足居憂忘貽髮膚之痛豈所以
臨河永歎含育最靈者也伏惟陛下施博天地澤深禹
湯溫舒之策優游虛授衛展之議寧失弗經削秋荼之
法解凝脂之網

為卞彬謝修卞忠貞墓啓

臣彬啓伏見詔書并鄭義泰宣勅當賜修理臣亡高祖
晉故驃騎大將軍建興忠貞公壺墳瑩臣門緒不昌天
道所昧忠構身危孝積家禍名教同悲隱淪惆悵而年

世貿遷孤裔淪塞遂使碑表蕪滅丘樹荒毀狐兔成穴
童牧哀歌感慨自哀日月纏迫陛下弘宣教義非求效
於方今壺餘烈不泯固陳力於異世但加等之渥近闕
於晉典樵蘇之刑遠流於皇代臣亦何人敢謝斯幸不
任悲荷之至謹奉啓以聞謹啓

牋

到大司馬記室牋

記室參軍事任昉死罪死罪伏承以今月令辰肅膺典

冊德顯功高光副四海含生之倫庇身有地况昉受教
君子將二十年咳唾為恩眄睐成飾小人懷惠顧知死
所昔承嘉宴屬有緒言提挈之旨形乎善謔豈謂多幸
斯言不渝雖情謬先覺而迹淪驕餌湯沐具而非弔大
厦構而相賀明公道冠二儀勲超邃古將使伊周奉轡
桓文扶轂神功無紀作物何稱府朝初建俊賢翹首維
此魚目唐突璫璵顧已循涯寔知塵忝千載一逢再造
難答雖則隕越且知非報不勝荷戴屏營之至謹詣聽

奉白牋謝聞昉死罪死罪

梁國府僚勸進牋

伏承嘉命顯至佇策明公逡巡盛禮斯實謙尊之旨未
窮遠大之致何者嗣君棄常自絕宗社國命民生翦為
仇讐折棟崩榱壓焉自及卿士懷脯斲之痛黔首懼叱
屋之誅明公亮格天之功拯水火之切再躔日月重綴
參辰反龜玉於塗泥濟斯民於阡岨使夫匹婦童叟羞
言伊呂鄉校里塾耻談五霸而位卑乎阿衡地狹於曲

阜慶賞之道尚其未洽夫大寶公器非要非距至公至平當仁推讓明公宜祇奉天人允膺大禮無使後予之歌同彼胥怨兼濟之仁翻為獨善

府僚重請牋

近以朝命蘊隆冒奏丹誠奉被還令未蒙虛受措紳顒顒深所未達蓋聞受金於府通人之弘致高蹈海隅匹夫之小節是以履乘石而周公不以為疑贈玉璜而太公不以為讓況世哲繼軌先德在民經綸草昧歎深微

管加以朱方之役荆河是依班師振旅大造王室雖復
累跡救宋重脰存楚居今觀古曾何足云而惑甚盜鐘
功疑不賞皇天后土不勝其酷是以玉馬駿奔表微子
之去金版出地告龍逢之怨明公據鞍輟哭厲三軍之
志獨居掩涕激義士之心故能使海若登祗罄圖効祉
山戎孤竹束馬景從伐罪弔民匡時靜亂匪叨天功實
勤濡足且明公本自諸生取樂名教道風素論坐振雅
俗不習孫吳邁茲神武驅盡誅之民濟必封之俗龜玉

不毀誰之功與獨為君子將使伊周何地某等不達通
變實有愚誠不任慳欸棘心重謁伏願特膺典策式副
民望

書

為庾杲之與劉居士蚪書

自別荆南迄將二紀杲之牽滯形有推遷物役丈人沒
志外身超然獨善雖心懸咫尺而事阻山河悠悠白雲
依然有道金涼佇運想恒納宜冲明在襟履候無爽體

道為用蹈理則和果之牽綴疲朽愧心已多訪德則山林窅然觀道則風雲自遠歲暮之期指塗衡岳神氣虛懋無待怡和江湖相望安事行李司徒竟陵王懋於神者言象所絕接乎事者遐邇所宗鍾石非禮樂之本纓褐豈朝縶之謂想閤投之懷不以形骸為阻一日通籍梁邸親奉話言夢想清塵為歲已積以丈人非羔鴈所榮故息蒲帛之典勝寄冥通諒有風期之遲君王卜居郊郭縈帶川阜顯不徇功晦不標迹從容乎人野之間

以窮二者之致且弘護為心廣乎真俗思聞繫表共剖
衆妙比日式筵山阿虛館川渌實望賁然少訓側遲音
東平樂善旌君大於東閣今王愛素致吾子於西山豈
不盛歟百齡飄驟凝滯自物千載一期為仁由已且零
雪戒塗非滅迹之郊鴻鐘在御豈銷聲之道已標異人
之迹故有同物之勞夫山水無情應之以會愛聞在我
觸目蕭條衡岳何親鍾嶺何薄想弘思有在不俟繁言

答何脩書

得書知便遠追疏董超然高蹈雖朝旨殷勤而輕棹已
遠供餞莫申瞻言增慨善保嘉猷比致音息懷人望古
潛悵久之

與江革書

建安王為雍州刺史革為記室參軍與弟觀
少長共居苦求同行乃以觀行參軍兼記室
時沈約任昉並相
賞重昉與革書

此段雍府妙選英才文房之職總卿昆季可謂馭二龍
於長途騁騏驥於千里

與沈約書

卷九十一

范僕射遂不救疾范侯淳孝睦友在家必聞直道正色
立朝斯著一金之俸必徧親倫鍾庾之秩散之故舊佐
命興王心力俱盡謀猷忠允諒誠匪躬破產而字死友
之孤開門而延故人之殯則惟其常無得而稱矣器用
車馬無改平生之素憑論款對不易布素之交若斯人
者豈云易遇昉將蒞此邦務在端邁雖解駕流連再貽
欸顧將乖之際不忍告別無益離悲祇增今恨永念平

生忽焉疇曩追尋笑緒皆成悲端

弔樂永世書

永世孝友之至發自天真皎潔之操曾非矯飾意有所
固白及不移理有所託淄澠自辨餘息雖存視陰無幾
終始之托方寄祁侯豈謂樂生反先朝露以理遣滯鄙
識未曉以事尋悲哀楚交至松楸可拱悲緒無窮

策文

天監三年策秀才文三首

問秀才朕長驅樊鄧直指商郊因藉時來乘此厯運當
扈永念猶懷慙德何者百王之敝齊季斯盛衣冠禮樂
掃地無餘斲雕刊方經綸草昧採三王之禮冠履粗分
因六代之樂宮懸始辨而百度草創倉廩未實若終畝
不稅則國用靡資百姓不足則惻隱深慮每時入芻橐
歲課田租愀然疚懷如憐赤子今欲使朕無滿堂之念
民有家給之饒漸登九年之蓄稍去關市之賦子大夫
當此三道利用賓王斯理何從佇聞良說

問朕本自諸生弱齡有志閉戶自精開卷獨得九流七
略頗嘗觀覽六藝百家庶非牆面雖一日萬幾早朝宴
罷聽覽之暇三餘靡失上之化下草偃風從惟此虛寡
弗能動俗昔紫衣賤服猶化齊風長纓鄙好且變鄒俗
雖德慙往賢業優前事且夫搢紳道行祿利然也朕傾
心駿骨非思真龍輜駟青紫如拾地芥而情游廢業十
室而九鳴鳥蔑聞子衿不作弘獎之路斯既然矣猶其
寂寞應有良規

問朕立諫鼓設謗木於茲三年矣比雖輻湊闕下多非
政要日伏青蒲罕能切直將齊季多諱風流遂往將謂
朕空然慕古虛受弗弘然自君臨萬寓介在民上何嘗
以一言失旨轉徙朔方睚眦有違論輸左校而使直臣
杜口忠讜路絕將恐弘長之道別有未周悉意以陳極
言無隱

序

王文憲集序

公諱儉字仲寶瑯琊臨沂人也其先自秦至宋國史家
謀詳焉晉中興以來六世名德為海內冠冕古語云仁
人之利天道運行故呂虔歸其佩刀郭璞誓以淮水若
離翦之止殺吉駿之誠感蓋有助焉公之生也誕受命
世體三才之茂典踐得二之庶幾信乃昴宿垂芒德精
降祉有一於此蔚為帝師況乃淵角殊祥山庭異表望
衢罕窺其術觀海莫際其瀾宏覽載籍博遊才義若乃
金版玉匱之書海上名山之旨沉鬱澹雅之思離堅合

異之談莫不總制清衷遞為心極斯固通人之所包非
虛明之絕境不可窮者其惟神用者乎然檢鏡所歸人
倫以表雲屋天構匠者何工自函洛不守憲章中輟賀
生達禮之宗蔡公儒林之亞闕典未補大備茲日至若
齒危髮禿之老含經味道之生莫不北面人宗自同資
敬性託夷遠少屏塵雜自非可以弘獎風流增益標勝
未嘗留心也期歲而孤叔父司空簡穆公早所器異年
始志學家門禮訓折衷於公孝友之性豈伊橋梓夷雅

之體無待韋弦汝郁之幼挺淳至黃琬之早標聰察曾
何足尚年六歲襲封豫寧侯拜日家人以公尚幼弗之
先告既襲絳組對揚王命因便感咽若不自勝初宋明
帝居藩與公母武康公主素不協及即位有詔毀發舊
塋投棄棺柩公以死固請誓不遵奉表啓酸切義感人
神太宗聞而悲之遂無以奪也初拜秘書郎遷太子舍
人以選尚公主拜駙馬都尉元徽初遷秘書丞於是采
公曾之中經刊弘度之四部依劉歆七畧更撰七志蓋

嘗賦詩云稷契匡虞夏伊呂翼商周自是始有應務之
迹生民屬心矣時司徒袁粲有高世之度脫落塵俗見
公弱齡便望風推服歎曰衣冠禮樂盡在是矣時粲位
亞台司公年始弱冠年勢不侔公與之抗禮因贈粲詩
要以歲暮之期中以止足之戒粲答詩云老夫亦何寄
之子照清襟服闋拜司徒右長史出為義興太守風化
之美奏課為最還除給事黃門侍郎旬日遷尚書吏部
郎參選昔毛玠之清公李重之識會兼之者公也俄遷

侍中以愍侯始終之職固辭不拜補太尉右長史時聖
武定業肇基王命寤寐風雲實資人傑是以宸居膺列
宿之表圖緯著王佐之符俄遷左長史齊臺既建以公
為尚書右僕射領吏部時年二十八宋末艱虞百王澆
季禮紊舊宗樂傾恒軌自朝章國紀典彛備物奏議符
策文辭表記素意所不蓄前古所未行皆取定俄頃神
無滯用太祖受命以佐命之功封南昌縣開國公食邑
二千戶建元二年遷尚書左僕射領選如故自營郅分

司盧欽兼掌譽望所歸允集茲日尋表解選詔加侍中
又授太子詹事侍中僕射如故固辭侍中改授散騎常
侍餘如故太祖崩遺詔以公為侍中尚書令鎮國將軍
永明元年進號衛將軍二年以本官領丹陽尹六輔殊
風五方異俗公不謀聲訓而楚夏移情故能使解劍拜
仇歸田息訟前郡尹溫太真劉真長或功銘鼎彝或德
標素尚臭味風雲千載無爽親加弔祭表薦孤遺遠協
神期用彰世紀時簡穆公薨以撫養之恩特深恒慕表

求解職有詔不許國學初興華夷慕義經師人表允茲望
實復官領國子祭酒三年解丹陽尹領太子少傅餘悉
如故挂服捐駒前良取則卧轍棄子後予胥怨皇太子
不矜天姿俯同人範師友之義穆若金蘭又領本州大
中正項之解職四年以本號開府儀同三司餘悉如故
謙光愈遠大典未申六年又申前命七年固辭選任帝
所重違詔加中書監猶參掌選事長輿追專車之恨公
曾甘鳳池之失夫奔競之途有自來矣以難知之性協

易失之情必使無訟事深弘誘公提衡惟允一紀於茲
拔奇取異興微繼絕望側階而容賢候景風而式典春
秋三十有八七年五月三日薨於建康官舍皇朝軫慟
儲鉉傷情有識銜悲行路掩泣豈直春者不相工女寢
機而已哉故痛深衣冠悲纏教義豈非功深砥礪道邁
舟航沒世遺愛古之益友追贈太尉侍中中書監如故
給節加羽葆鼓吹增班劍六十人謚曰文憲禮也公待
物斯厚居身以約玩好絕于耳目布素表于造次室無

姬姜門多長者立言必雅未嘗顯其所長持論從容未
嘗言人所短弘長風流許與氣類雖單門後進必加善
誘勗以丹青之價弘以青冥之期公銓品人倫各盡其
用居厚者不矜其多處薄者不怨其少窮涯而反盈量
知歸皇朝以治定制禮功成作樂思我民譽緝熙帝圖
雖張曹爭論於漢朝荀摯競爽於晉世無以仰模淵旨
取則後昆每荒服請罪遠夷慕義宣威授旨實寄弘略
理積則神無忤往事感則悅情斯來無是已之心事隔

於容諂罕愛憎之情理絕於毀譽造理常若可干臨事每
不可奪約已不以廉物弘量不以容非攻乎異端歸之
正義公生自華宗世務簡隔至於軍國遠圖刑政大典
既道在廊廟則理擅民宗若乃明煉庶務鑒達治體懸
然天得不謀成心求之載籍翰牘所未紀訊之遺老耳
目所不接至若文案自環主者百數皆深文為吏積習
成奸畜筆削之刑懷輕重之意公乘理照物動必研幾
當時嗟服若有神道豈非希世之儔民瑚璉之宏器昉

行無異操才無異能得奉名節迄將一紀一言之譽東陵侔於西山一盼之榮鄭璞踰於周寶士感知已懷此何極出入禮闈朝夕舊館瞻棟宇而興慕撫身名而悼恩公自幼及長述作不倦固以理窮言行事該軍國豈直雕章縟采而已哉若乃統體必善綴賞無地雖楚趙群才漢魏衆作曾何足云昉嘗以筆札見知思以薄技効德是用綴緝遺文永貽世範為如千卷所撰古今集記今書七志為一家之言不列于集集錄如左

文章緣起序

六經素有歌詩書誄箴銘之類尚書帝庸作歌毛詩三百篇左傳叔向貽子產書魯哀公孔子誄孔悝鼎銘虞人箴此等自秦漢以來聖君賢士沿著為文章名之始故因暇錄之凡八十四題抑以新好事者之目云爾

議

齊明帝謚議

以為窮神之迹無繼于成名教思所宗言歸於有稱是

以則天為大義盡於翼善武功受命理貫於斯文伏惟
功高五讓道冠三極愛敬始於揚名孝饗終乎嚴配寥
廓大度誕君人之符閨庭小節應軌物之訓歷試允諧
納揆時序貽厥之寄義均負圖棟棟維新壓焉將及於
是承制宣德定策公卿登嗣后於西鍾反獨夫於侯服
既而主幼時艱仍離屯蹇應當璧之祥注息肩之願立
德以長紹開中興擬度天行取則乾健日昃罷朝幽枉
必達官曹寂寞圜犴空虛虎門肆義大足協律巖廊有

縉紳之談鄉塾無橫議之士既富而教弘此孝治遂使
家無蕩子堊有栖畝置天下於掌握覽八荒於戶牖寵
微金穴之家恩絕椒風之館天應民和祥符惣暨故能
上變雲物下漏深泉若乃清丘丹陵之國黃銀紫玉之
瑞幽符遠萃詢德報功方將馳道日觀清宮鳴澤為而
不恃高揖成功百川所以朝宗參辰於焉取正豈所謂
中衢均奠懸衡共軌者歟

哀策文

王貴嬪哀策文

游衣戒節轎車命服永去椒華長辭嘉福笄緘遺組筵
委塵鞠將命啓期實惟嘉數珮空響其何節姆下當其
誰傳殯宮既毀祖饋斯撤爰命史臣宣美來裔坤載既
厚內德云助軒五有弘姬十斯豫誕茲邦淑選自良家
爰登六列象服委蛇青絢丹纓辰衣素紗肅雍婦職僉
曰俞佳贊景望舒方娠明兩心前軌慶軒中增朗與括
不愆拙魄無爽式陪壘觀有事蠶宮降輿訪道基我王

風宣禮撤豆緝樂房中居貴能降在盈思冲仁者必壽
彼蒼者穹如何不淑萬化齊終薦車告途殯窆既辨黼
翬瑤以陸離帷幌紛其舒卷出桂宮而北行經未央以
西轉池紼顧而徐前服馬嘶而不踐霜霏微而初被塋
空籠而始雕促虞泉於薤露撫悲翁於短簫母以子貴
義弘前哲申襄齊削以從疑草麻繚之輕殺達副君之
天至賦白華之無缺庶清廟之微微非壽原之未翳

碑

丞相長沙宣武王碑

玉映藍田金鉉之望已集木秀鄧林輪轅之用先表值
戎寇貪怵羈縻失道憑陵雉堞逼迫濠淠都護之威既
弛副尉之策已謝斧松晨析易子朝餐乞師援絕飛書
路阻公內定不戰之奇外騁必勝之畧神功倏忽有同
拾遺南下牧馬既寢折膠之術北遯燕然將空漠南之
地加以廣平簡惠信賞必罰增貲就賦夷歌成章

桓宣城碑

君器量高濬神氣披朗商畧雅俗隱括真偽擢奇取異
不軌常流固以準的當時擬議郭許矣處身立朝不峻
功名俯仰顯默之際優游可否之間迹卑而道不汙身
屈而志不屑矣銘曰

於穆我后稟茲純爽虛豁高暢蕭條邁上風任外舒卓
鑒內朗神棲冲慎形同俯仰將登槐棘宏振綱綱令儀
早徂德音永響

墓銘

撫軍桂陽王墓銘

於昭帝緒擅美前王綠圖丹紀金簡玉筐世載台鼎地
居魯衛沛易前傳楚詩將說桐圭誰戲甘棠何憇

劉先生墓銘

既稱萊婦亦曰鴻妻復有令德一與之齊實佐君子簪
蒿杖藜欣欣負戴在冀之畦居室有行亟聞義讓稟訓
丹陽弘風丞相藉甚二門風流遠尚肇允才叔閭德斯
諒蕪沒鄭鄉寂寥揚冢參差孔樹毫末成拱暫起荒埏

長局幽隴夫貴妻尊匪爵而重

行狀

齊竟陵文宣王行狀

公道亞生知照臨幾庶孝始人倫忠為令德公實體之
非毀譽所至天才博瞻學綜該明至若曲臺之禮九師
之易樂分龍趙詩析齊韓陳農所未究河間所未輯有
一於此罔不兼綜者歟昔沛獻訪對於雲臺東平齊聲
於揚史淮南取貴於食時陳思見稱於七步方斯蔑如

也初沈攸之跋扈上流稱亂陝服宋鎮西晉熙王南中
郎邵陵王並鎮益口世祖毗贊兩藩而任總西伐公時
從在軍鎮西府版寧朔將軍軍主南中郎版補行參軍
署法曹于時景燭雲火風馳羽檄謀出股肱任切書記
遷左軍邵陵王主簿記室參軍既允焚林之求實兼儀
形之寄刀筆不足宣功風體所以弘益除邵陵王友又
為安南邵陵王長史東夏形勝關河重複選衆而舉敦
悅斯在除使持節都督會稽南陽臨海永嘉新安五郡

諸軍事輔國將軍會稽太守太祖受命廣樹藩屏公以
高昭武穆惟戚惟賢封聞喜縣開國公食邑千戶又以
奏課連最進號冠軍將軍越人之巫覩正風而化俗篁
竹之酋感義讓而失險邪叟忘其西爰龍丘狹其東臯
會武穆皇后崩公星言奔波泣血千里水漿不入於口
者至自禹穴逮衣裳外除心哀內疚禮屈於厭降事迫
於權奪而茹感肌膚沉痛創距故知鍾鼓非樂云之本
綰麗非隆殺之要改授征虜將軍丹陽尹良家入徙戚

里內屬政非一軌俗備五方公內樹寬明外施簡惠神
臯載穆轂下以清武帝嗣位進封竟陵郡王食邑如千
戶復授使持節都督南徐兗二州諸軍事鎮北將軍南
徐州刺史遷使持節侍中都督南兗徐北兗青冀五州
諸軍事征北將軍南兗州刺史兗徐接壤素漸河潤未
及下車仁聲先洽玉闕靜柝北門寢扃朝旨以董司徒
牧數興邦教方任雖重比此為輕徵護軍將軍兼司徒
侍中如故又授車騎將軍兼司徒侍中如故即授司徒

侍中又如故上穆三能下敷五典闢玄闡以闡化寢鳴
鐘以體國翼亮孝治緝熙中教奪金耻訟蹊田自嘿不
雕其朴用晦其明聲化之有倫繫公是賴庠序肇興儀
形國胄師氏之選允歸人範以本官領國子祭酒固辭
不拜八座初啓以公補尚書令式是敷奏百揆時序夫
國家之道互為公私君親之義遞為隱犯公二極一致
愛敬同歸亮誠盡規謀猷弘遠矣又授使持節都督揚
州諸軍事揚州刺史本官悉如故舊惟淮海今則神牧

編戶殷阜氓俗滋繁不言之化若門到戶說矣頃之解
尚書令改授中書監餘悉如故獻納樞機絲綸允緝武
皇晏駕寄深負圖公仰惟國典俛遵遺託俯擗天倫踊
絕於地居處之節復如居武穆之憂聖主嗣興地居旦
奭有詔策授太傅領司徒餘悉如故坐而論道動以觀
德地尊禮絕親賢莫二又詔如公入朝不趨讚拜不名
劔履上殿蕭傳之賢曹馬之親兼之者公也復以申威
重道增崇德統進督南徐州諸軍事餘悉如故並表疏

累上身沒讓存天不慙遺梁岳顏峻某年某月日薨春
秋三十有五詔給溫明秘器歛以衮章備九命之禮遣
大鴻臚監護喪事朝夕奠祭大官供給禮也故以慟極
津門感克長樂豈待春人不相傾壘罷肆而已哉乃下
詔曰褒崇庸德前王之令典追遠尊戚公情之所隆故
使持節都督揚州諸軍事中書監太傅領司徒揚州刺
史竟陵王新除進督南徐州體睿履正神監淵邈道冠
民宗具瞻惟允肇自弱齡孝友光備爰及贊契協升景

業燮和台曜五教克宣敷奏朝端百揆惟穆寄重先顧
任均負圖諒以齊微二南同規徃哲方憑保佑永翼雍
熙天不憖遺奄見薨落哀慕抽割震動於厥心今先遠
戒期龜謀襲吉茂崇嘉制式弘風猷可追崇假黃鉞侍
中都督中外諸軍事太宰領大將軍揚州牧綠綬綬具
九錫服命之禮使持節中書監王如故給九旒鑾輅黃
屋左纛輜涼車前後部羽葆鼓吹挽歌二部虎賁班劍
百人葬禮一依晉安平獻王孚故事公道識虛遠表裏

融通淵然萬頃直上千仞僕妾不睹其喜愠近侍莫見
其傾弛他人之善若已有之民之不臧公實貽恥誘接
恂恂降以顏色方於事上好下規已而廉於殖財施人
不倦帝子儲季令行禁止國網天憲實諸掌握未嘗鞠
人於輕刑錮人於重議人有不及內恕諸已非意相干
每為理屈任天下之重體生民之俊華袞與緼緒同歸
山藻與茅茨俱逸良田廣宅符仲長之言邛山洛水協
應叟之志丘園東國錙銖軒冕乃依林構宇傍巖拓架

清猷與壺人爭旦緹幙與素瀨交輝置之虛室人坐何
辨高人何點躡蹻於鍾阿徵士劉蚪獻書於衡岳贈以
古人之服弘以度外之禮屈以好士之風申其趨王之
意乃知大春屈已於五王君大降節於憲后致之有由
也其卉木之奇泉石之美公所製山居四時序言之已
詳文皇帝養德東朝同符作者爰造九言實該百行遵
衿禱於未萌申炯戒於茲日非值旦暮千載故乃萬世
一時也命工註解衛將軍王儉綴而序之山宇初構超

然獨往顧而言曰死者可歸誰與入室尚想前良俾若
神對乃命畫工圖之軒牖既而緬屬英賢傍思才淑匹
婦之操亦有取焉有客游梁朝者從容而進曰未見好
德愚竊惑焉即命刊削投杖不暇公以為出言自口驥
驟不追聽受一謬差以千里所造箴銘積成卷軸門階
戶席寓物垂訓先是震於外寢匠者以為不祥將加治
葺公曰此天譴也無所改修以記吾過且令戒愆不怠
從諫如順流虛已若不足至於言窮藥石若味滋旨信

必由中貌無外悅貴而好禮怡寄典墳雖牽以物役孜
孜無怠乃撰四部要畧淨住子並勒成一家懸諸日月
弘洙泗之風闡迦維之化大漸彌留話言盈耳黜殯之
請至誠懇惻豈古人所謂立言於世沒而不朽者歟易
名之典請遵前烈謹狀

齊司空曲江公行狀

公稟靈景宿擅氣中和一匱初登東嶽之功可監埏埴
在器瑚璉之姿先表豈惟荆南有聖童之目襄城著孔

甫之稱而已哉故以羽儀宗家冠蓋後進路叔之一日
千里北海之稱美共治方斯茂如也志學之年徧治經
記登隆十載網羅百氏藻斷瞻逸蔚為詞宗延賈誼而
升堂携相如而入室加以翰牘精辯發言有章持論從
容辭無矜尚自河洛丘墟歷載二百俾我逢掖遂淪左
袵晉宋所以遺恨宗祖是用顧懷公自荷方任志在剋
復將欲使功遂之日身退有所爰乃卜居金陵縈帶林
壑用辭聊城之賞以為疏韓之館人謝運往遂輟遠圖

弔文

弔劉文範文

余與先生雖年世相接而荆吳數千未嘗膝行下風稟
承餘論豈值發憤當年固亦恨深終古然叔夜之叙黔
婁韓卓之慕巨仲未必接光塵承風采正復希向遠理
長想千載然其人自高假使橫經擁篲日夜掃門會不
睹千仞之一尺萬頃之涓澮終於對面萬古莫能及門
故以此弔千載之恨

詩

為王嫡子侍皇太子釋奠宴

以下
四言

在昔歸運阻亂弘多夷山製宇盪海為家風雲改族日
月增華欽聖茲遠懷道茲冲踐言動俗果行移風進往
一簣啓或三蒙冰實因水金亦在銘惟神知化在物立
言樂正雅頌咸被後昆告奠明祀觀道聖門日月不息
師表常尊

贈王僧孺

王僧孺由治書侍御史出為唐令初僧孺與昉文學友會及是將之縣昉贈詩

惟子見知惟余知子觀行視言要終猶始敬之重之如
蘭如芷形應影隨曩行今止百行之首立人斯著子之
有之誰毀誰譽修名既立老至何遽誰其執鞭吾為子
御劉畧班藝虞志荀錄伊昔有懷交相欣勗下惟無倦
升高有屬嘉爾晨燈惜余夜燭

答劉居士

君子之道亦有其四高行絕俗盛德出類才同文錦學

非書肆望之可階即之難至輟精天理躋象少微人與
俗異道與人違庭飛熠燿室滿伊威行無轍跡理絕心
機

九日侍宴樂遊苑

以下
五言

帝德峻韶夏王功書頌平共貫汾五勝獨道邁三英我
皇撫歸運時乘信告成一唱華鍾石再撫被絲笙黃草
歸雒木梯山薦玉榮時來濁河變瑞起溫洛情物色動
宸眷民豫降皇情

奉和登景陽山

物色感神遊升高悵有閱南望銅駝街北走長楸埒別
澗宛滄溟疏山駕瀛碣奔鯨吐華浪司南動輕柅日下
重門照雲開九華澈觀閣隆舊恩奉圖愧前哲

泛長溪

狗祿聚歸糧依隱謝羈勒絕物甘離羣長懷思去國長
溪永東舍震區窮水域道遇垂綸叟聊訪問津惑弭楫
申九言無為累牽經長泛滄浪水平明至曛黑

落日泛舟東溪

黝黝桑柘繁芄芄麻麥盛交柯溪易陰反景澄餘映吾
生雖有待樂天庶知命不學梁甫吟惟識滄浪詠田荒
我有役秩滿余謝病

濟浙江

昧旦乘輕風江湖忽來往或與歸波送乍逐翻流上近
岸無暇目遠峰更興想綠樹懸宿根丹崖顏久壤

贈郭桐廬出谿口見候余既未至郭仍進村維

舟久之郭生方至

朝發富春渚蓄意恐相思逐令行春返冠蓋溢川坻望
久方來萃悲懼不自持滄江路窮此湍險方自茲疊嶂
易成響重以夜猿悲客心幸自弭中道遇心期親好自
斯絕孤遊從此辭

答何徵君

散誕羈鞅

一作
勒

外拘束名教裏得性千乘同山林亦朝

市勿以耕蠶貴空笑易農士宿昔仰高山超然絕塵軌

傾壺已等樂命管亦齊喜無為歎獨遊若終

一作路

方同

止

贈徐徵君

外編作吳均者非

促生悲永路早交傷晚別自我隔客微於焉徂歲月情
非山河阻意似江湖悅東臯有儒素杳與榮名絕曾是
違賞心曷用箴余缺眇焉追平生塵書廢不閱信此伊
能已懷抱豈暫輟何以表相思貞松擅嚴節

答劉孝綽

孝綽繪之子年十四父黨沈約任昉等聞其名命駕造焉昉尤相賞愛天監初孝綽起家著作佐郎為歸沐
詩贈昉昉報曰

閱水既成瀾藏舟遂移壑彼美洛陽子投我懷秋作久
敬類誠言吹噓似嘲謔兼稱夏雲盡復陳秋樹索詎慰

耄嗟人徒深老夫託

一作徒然
老夫諾

直史兼褒貶轄司專疾

惡九折多美疹匪報庶良藥子其崇鋒穎春耕勵秋穫

答到建安餉杖

故人有所贈稱以冒霜筠定是湘妃淚潛灑遂鄰彬狀

危復防咽事歸薄暮人勞君尚齒意矜此杖鄉辰復資

後坐

一作生

彥候余方欠伸獻君千里笑紆我百憂噸坐

適雖有器卧遊苦無津何由乘此竹直見平生親

寄到漑

到漑為建安太守

昉寄詩求二彩段

鐵錢兩當一百易代名實為惠當及時無待涼秋日

別蕭諮議

離燭有窮輝別念無終緒岐言未及申離目已先舉揆

景巫衡阿臨風長楸浦浮雲難嗣音徘徊悵誰與儻有
關外驛聊訪狎鷗渚

厲吏人講學

暮燭迫西榆將落誠南畝曰余本疎惰頽暮積榆柳踐
境渴師臣臨政欽益友盱食願橫經終朝思擁帚雖欣
辨蘭艾何用闢蒿莠

苦熱

旭旦烟雲卷烈景入東軒傾光望轉蕙斜日照西垣既

卷蕉梧葉復傾葵藿根重簾無冷氣挾石似懷溫霖霖
類珠綴喘赫狀雷奔

同謝朓花雪

土膏候年動積雪表晨暮散葩似浮玉飛英若總素東
序皆白珩西雖盡翔鷺山經陋密榮騷人貶瓊樹

出郡傳舍哭范僕射三首

平生禮數絕式瞻在國楨一朝萬化盡猶我故人情待
時屬興運王佐俟民英結懽三十載生死一交情攜手

遁衰孽接景事休明運阻衡言草時泰玉階平濬冲得
茂彥夫子值狂生伊人有涇渭非余楊濁清將乖不忍
別欲以遣離情不忍一辰意千齡萬恨生

已矣平生事詠歌盈篋笥兼復相嘲謔常與虛舟值何
時見范侯還叙平生意

與子別幾辰經塗不盈旬弗覩朱顏改徒想平生人寧
知安歌日非君撤瑟辰已矣余何歎輟春哀國均

嚴陵瀨

羣峰此峻極參差百重嶂清淺既連漪激石復奔壯神
物徒有造終然莫能狀

詠池邊桃

已謝西王苑復揖綏山枝聊逢賞者愛棲趾傍蓮池開
紅春灼灼結實夏離離

聯句

清暑殿聯句栢梁體

居中負宸寄纓紱

梁武帝

言慙輻輳政無術

新安太守任昉

至德

無垠愧違弼

侍中徐勉

燮贊京河豈微物

丹陽丞劉汎

竊侍兩宮

慙樞密

黃門侍郎柳澄

清通簡要臣豈汨

吏部郎中謝覽

出入帷扆濫

榮秩

侍中張卷

複道龍樓歌楸實

太子中庶子王峻

空班獨坐慙羊

質

御史中丞陸杲

嗣以書記臣敢匹

右軍主簿陸倕


謬參和鼎講畫一

司徒主簿劉治

鼎味參和臣多匱

司徒左西屬江曹

漢魏六朝百三集卷九十一



總校官庶吉士臣侍朝

校對官庶吉士臣陳墉

謄錄監生臣章浴魯